

## KMS EXECUTIVE COMMITTEE NEIH A NI

MDt. 27.09.2013 khan KMS Executive Committee Meeting vawi 5-na chu 1st Floor, Mizoram House, Ballygunge-ah tuang taka zawh a ni. He meeting-ah hian KMS Sport kan neih tak chungchang mai bakah thil pawimawh dang pawh rel nual a ni a, member-te'n kan hriat tur tul zualte chu:

1. Quiz Competition buatsaih tum a ni: KMS Executive Committee Meeting chuan zirlaite hmakhua ngaiin leh zirna lamah hma kan lo sawn zawk theih nan sum sing chuang lawmman inchuhna tur Quiz competition a buatsaih dawn. Chumi tur chuan sub-committee din a ni a, hengte hi ruat an ni:

Chairman : Zuliassa Hlychho

Secretary : Lalramnghaka

Patron : Alex Rosangluaia te an ni a, anni ho hnuai ah hian anmahni puihbawm turin member dangte an ruat belh dawn a ni.

Member-ten tun atangin inbuatsaih tan ila, competition a nih mai bakah keimahni knowledge atan

a ni tih kan hriat tel a tha hle bawk.

A hun tur erawh kumthar tir lamaah a nih rin a ni. Cheng sing chuang dawng theuh turin inbuatsaih ang u.

2. Zirlai tithate chawimawi tum a ni: KMS chuan zirna lama inelna thianghlim kan neih theih na'n leh zirna hma kan sawn zawk theih na'n Kolkataa Mizo zirlaite 1st Div chin chunglama pass-te leh class- x & xii 80% hmu chin chu chawimawi ni se tiin a rel a. Citation mai bakah Mizoram daily Newspaper lar takah chhuah ni se tiin a rel bawk.

Kuminah erawh chuan CMWA- in an chawimawi chin chauh kha chawimawi an ni rih ang.

## KEIMAHNI

Rokhawl hian mi hi a va han tibuai thin tak em! **Chuailo** chanchinbu chhuah hun tura kan tih leh kan chhut vek tawh pawh rokhawl hian hrang hrang avanga rei tak kan chawlh hnuah kan lo kir leh ta e! Tuna kan rawn chhuah pawh hian thenkhat hi a hlui deuh mai thei a. Chhiartute'n chawthing kan rawn her lum a ni tih min lo hriat sak dawn nia...

**Chuailo a Chuai ngai lo ang...**

### Fimkhur teh..

Tunlai hi sik leh sa inthlak hunlai a nih avangin tlang hrileng a tam a. Heng khawsik, mitna, hritlang leh natna dang dang kan kaiin, vei awl thin. Hetiang sik leh sa inthlak laia natna vei hi chu a dam har deuh bik thin avangin theitawpa kan inven a ngai a ni. Tihdam aiin inven a tha zawk si a....

### LAWMPUINA

Kan members Dr. Florence Lalhmingsangi leh Dr. Doris Lalrinawmi, BHMS-te chuan Dt. 10.10.2013 a result chhuakah hlawhtlinna an chan hi keini Editorial Board chuan kan lawmpuiin kan chhuang tak zet a ni. Tunah chuan nula Doctor an ni ta.

### Tualchhung...

Kolkata Mizo Student-ten kum tir atanga nghakhlel taka kan lo thlir tawh KMS Sports 2013 chu tuang takin Dt. 02.10.13 khan zawh fel a ni ta a. Sports tuang taka min hruaithlengtu leh sports kan neih chhung zawnga min vengtu Pathian hnenah lawmthu kan sawi a. He sports hlawhtlin theihna'na a tha thawhtu KMS member-te chungah KMS Executive Committee chuan lawmthu a sawi a, nakin zelah pawh KMS tana theitawp chhuah zel turin min sawm bawk a ni. He sports kan hman theihnan a min tanpuitute:

CEM LADC - Rs. 5,000, Home Mission School, Aizawl, Rs. 3,000; Pi Rozuali, Kolkata, Rs. 2,000; leh Tv. Lalramfela Ralte Exe. Com. KMS chuan football leh volleyball min pe bawk a ni. Tin, Pu Lalramsanga Sailo, IRS, Pu Hmingthanzauva, Assistant Resident Commissioner-ten refreshment siam nan an gas min hmantir bawk a ni. Pu Talo Rosanga, Additional Resident Commissioner-in KMS Sports, Kolkata pawn atanga rawn chhim, Asansol-a kan member-te thlenna tur Mizoram House min ruahmansak bawk a ni. Heng mite hi kan Sports hlawhtlin theihna te an ni a, an chungah hian KMS-in lawmthu kan sawi tak meuh a ni.

**KMS VULRENG RAWH SE....**

**Indona ruamah chuan 'Tunge mehtu chu?' tih hriat a ni ngai lo....**

# CHUAILO

Estd. May, 2004

Editor : ahooma  
 Joint Editors : VT.Lawmsanga  
                   : Lalruatkima  
                   : Vanlalpeki Ralte  
 Patron : Alex Rosangluaia

Zirna Huang...

## RTI Act....

Right to Information hming hi kan hre theuh tawh awm e. He Act hi kan hriatthiam theihdan tur berin han ziahlan i tum teh ang.

RTI Act-in a tum ber chu langtlang sawrkar (transparency) leh rintlak a awm theih nan te, hlemhletna leh hnathawh dan leh sum hmandan thlenga mitinin kan hriat duh kan hriat theihna dan hi a ni.

## Engtingne information kan lak tak ang?

State Public Information Officer ( SPIO)-ah lehkhah ziakin ( a hriat duh chu eng department huam chhunga mi nge a ni tih hriat tur), dilna hi dilna hmuna tawng tlanglawn ber hmangin theihluh theih a ni. SPIO hian a tlangpuiin dilna a dawnte hi ni 30 chhungin chhanna a pe tur a ni.

## Tute nge information chu dil thei le?

India khua leh tui dik tak (Indian Citizen) tu tan pawh dil theih a ni a, pawl (association) hming erawh chuan a dil theih loh thung a ni.

A chunga kan rawn ziahlan tak te khi RTI Act hmandan tlangpui chu a ni a, heng bakah hian hriattur tam tak a la awm bawk. Tin, information min pekah kan lungawi loh chuan zualkona (appeal) tur thlengin a la awm leh zel bawk a ni. RTI Act hnuaiah inforamation dil theih loh chin erawh sawrkarin a nei bawk a ni.

## I tun hun hi..

Ka mihring puite han fuih a, thil tha han hrilh tur hian finna leh thiamna ka nei lo tih chu kei aiin inhrechiang zawk ang a, tawngkamah lek phei chuan kei aia thiam leh hre ril zawk in ni ngei ang. Amaherawhchu, he thil hi hrilh che ka duh a ni.. ‘ I tan tun hun hi a pawimawh a ni..’ tih hi!

I hun kal tawh kha han ngaihtuah let vang vang teh.. siamthat duh leh nawh reh duh tam tak i nei ngei ang. Mahse, khang hun kal tah kha nawt reh tur chuan hunin a liampui tawh a, vana lawn tum ang mai a thil har a ni.

Hun lo la awm tur han thlir la, hriat lawk loh thil a inchhawp tih i hmu ang. Hun chunga thuneitu kan nih loh avang hian leilung hian a duh dan ang angin min vir pui mai zawk a ni. Chuvangin, i tun hun zel hi a pawimawh tih hriain, a tha thei ang bera hman tum ang che..

- Lalruatkima

## Enkawltu Kamliam

### Last Date

Hnamdang hi e' nge an an ka hre chiah lo a, keini Mizote erawh hi chu last date-a te,

last date-i te ni mai awm hi kan ni thiin ka hria; Exam leh Scholarship form tih vel fillup tur a awm reng rengin ‘engtik nge last date?’ tih hi kan thupui a ni fo thin. Chutih lain a scholarship pawisa dawn hunah erawh chuan ‘engtik thleng nge a lak theih’ tih lam ngaihtuah loin ‘engtik atangin nge an sem tan dawn’ tih chu kan ngaihven leh em em lawi si!

Heta tanga thil chiang taka lo lang ta chu kan thil ngaihpaimawh zawng leh kan rilru puthmang a ni. Midangte tana nawr kal chawp ngai leh kaih loha kal hleithei lo ang mai hian kan lang thin niin a lang.

Tun tuma kan annual magazine buatsaih turah pawh hian a hma fe atangin kan inhriattirin kan inhrilh a, hun tiam chhunga thlalak leh article thehltur turin kan inngen a, kan chhanna hmu tam zawk chu ‘engtik thleng nge theihluh theih?’ tih a ni.

Kan huntiam chu a ral der tawh a ni mai a, hemi chhunga rawn thehltur hmanlo kan la kuh tul tho mai; Mak thin teh e!

Harsatna awm thei tamtak pawh kan sawi lawk a, pooja chawlha in haw duh dawn hlawm avangin a hmain thla la lawk vek rawh u, tiin kan inhrilh vek a, heti chung pawh a a huna thehltur hman lo leh ngaihsak miah lo kan la awm tlat hi chu sawi ngaihna vak a awm lo ‘a mak’ a ni mai. Thupuan leh hriattirna ngai pawimawh lo lo hi hruaitute laka vui leh hruaitute tlin lohna lai hmu thei hlei hlei kan ni leh lawi si thin.

Tunah hian thlalak leh article rawn lut tawh sa atangin magazine chu kan khawrpum tawh mai dawn a, hun tamtak kan inpek chhung leh vawi engemawzat kan puan hnu pawha ngaihpawimawh duh lo tlatte kha chu kan ngaihpawimawh loh ve mai che u a ngai dawn a nih hmel.

Mihring nun hrim hrimah hian ‘nghah ngai’ ni loa ‘nghaktu’ nih hi a ropui zawk a, chumi dinhmunah chuan din vek theih tum ila a tha khawp mai, mi nghah leh dawm kana nawr kal reng ngai nih hi mi puitling lo zia a niin, keini zirlai lehkhathiamte chuan kan tihtur a ni lo. Mi nghaktu leh tanpuitu, nawr kal a, puibawmtu nih theuh i tum zawk teh ang u.



article

## A TAWP NAN AW!

-VT.Lawmsanga, Lake Town

Ih maw! Nizan ka mu chu zandang anglo takin tui takin ka mu ve ngei a lawm. Kulkhut khawlum hnuaiyah puan ka sin avang ringawt pawh khan kha zan kha chu khua var tawh lovin zanthum vel tal inzawm se tiin duhthu ka sam neuh neuh asin. Zantir lama ruah a sur vangte pawh a ni mah na le!

Khua var tawh rih lo mai se tia am taka ka muthilh lai chuan, min thangharhtu awm ang mai hian ka harh fim hlawl mai. Ka sana ka en a, 3:45am a lo ri tawh a. Mutin awmzia a nei dawn lo tih ka hriat chian em avang chuan cigarette chu lain ka zu khu hluah hluah a. Kawngkapui ka khar ngaih loh avangin tukverh atanga street light rawn chhun chuan pawn pawh tlem azawng chu a lang thei a, nangma aw ngeiin “U Lawm” tia vawihnih Chiang zeta min koh ka hre tlat a, ka rawn hawi vata hmuh tur reng i awm si lo. Tichuan ui tak leh thinphu dep dep chung siin zan duhawm chu ka thawhsan ta a nih kha.

Engin nge min mawlh pawh ka hre chiah lo, nang, kei atana mitthi tawh kha hmuh leh che ka beisei tlat kha a ni. Pawn ka han chhuak a, kan tual zawl zau tak, 60 sq.ft zeta zauah chuan I hmel hmuh kha ka inring lutuk a, ka hmuh mai loh che avangin kan in chung chiah tower awmna lamah i awm ka ring tlat pek a, thin phu dep dep chung leh beisei bo tak chung siin in chung lam lawna kailawn (ladder)- ah chuan muang changa lawn chhoin ka la zawng leh hram che a. Kan hostel hi 7th floor a awm kan nia, kan awmna bulhnaiah kan hostel aia in sang a awm loh avangin khawi hmunah mah I kalbona hman a awm si lo.

Chunglam ka han en chho a, khua a thiingin a eng em em a, thlasik laia arsi kawng leh thlasik boruak vawt vin zet ni lemlo mah se, an inhlat lo viau. Kawngpui lam ka zuk hawithla a, a khat tawkin motor a rawn tlan zeuh zeuh a. Kawng kama thingbuk tha zet leh mawi tak hnuaiyah chuan city bus a intlar phei put a, bus chung driver thenkhat mu thin pawh an awm tak loah chuan, tu hril mah ngai lovin a thlasik boruak tawh riau tih chu a hriat mai.

Thla pawh a eng tha riau na chungin light eng vel avangin a hlutna a nep deuh a, mahse keia thinlungah erawh kan tiam thu di min hriatpuitu a nihna vang hrim hrim pawh khan engdang zawng aiin ka ngaina nghal ringawt mai asin, ka â I ti viau ang ti rawh.

Kawng sira park te tak têt, nuam tak leh felfai tak, inhmangaihte tana thutdunna hmun nuam em ema kan thu kha chu, khawvel hi a mawiin a par vul chuk asin. Ka hlimna belhchhah tura ka darah nghenga zawi sapa, **“I ta ka nih hunah chuan, tihian I kiangah thuin ka ngheng kumkhua ang che”** ti a ka mitah tak min en phei kha chuan, tu fapa hian nge kha i meng mawi tak kha hmu hmaih thei ang le!

I khabeah dim taka dawmchho chein i hmui sen vam ham maiah duhthaw taka ka fawh lai che a, ka nghawnga min rawn kuah phei kha chuan e, khawvel hi hlimna leh lawmna hlirin a khat a ni. Chutah ngawi rengin lungchim takin, nghet takin kan inpawm vawng vawng a, khang laia ka rilru kha chu mihring tawngkam hi chuan a sawifiah zo lo. Chutia lungchim taka kan inpawm reng lai chuan umbulance hi hmanhmawh tak leh a siren ring mang khenga rawn tlan chuan, ka ngaihtuahna ata min tiharhchhuak zawk a, tower bula ding chuan ka melh ngai chu ka lo melh tlawk tlawk chu niin, ka harh meuh chuan thinrimnain ka khat thar leh a.

Ni e, rinawmna intiam dunin, hmangaihna kan inhlan a, kan intawn leh hma zawng **‘rinawm takin i tan chauh’** kan ti a nih kha. Nangmah ka rin em avang chein leh kan hmalam hun tur ka thlirin ka chhel phah nasa viau reng asin. En teh, inru tih kan thiannu berin mi rawn bia a, tap chung mi rawn hrilh lai kha chuan e, khawdang atanga ka thiante ka bazarpuui mek tih pawh ka hrechang tawh lova, tunge ka bulah awm a, engtinngge ka awm pawh kha ka hrelo thelh a ni. Ka thiante hmemna leh an mi ngaihtuahna avang khan, ka pawnlam chu a nuileh thei hram a, chhungril erawh a kehsawm vek asin.

Nangmah avangin mi ramah, hmeichhe tana siam ni lo ang hrimin, green signal min petute pawh ka hmulo lui kha a ni si a Ka atna leh mawlina em pakhat chu, ‘Hmeichhia’ I ni tih ka hriat loh kha a ni. Nangmah avangin I hmeichhepuite laka ka rilru puthmang pawh a inthlak hlawk a, tumah rintlak an awm hian ka hre tawh lo hial a. Ni e, nang kha chu i nungchang a mawiin i fel em vang a ni. I lakah ka thinrim viau mah se, ka lo hmangaih hman tawh che avangin awlsam taka theihnghilh thei erawh i ni lova, ka tum lui tawh hek lo.

Mizoram ka rawn chuan chhuah a, i pasal thianpa, i pasal tana karhnih chuang bemtu che khan, thingpui in puiah min sawm a, ngaihdamte min dil nasa a, ngaihawng ka nei i tih chung pawh a bansan duh loh thute min hrilh a. Nang hmeichhia zingah pawh hmeichhe ber tan chuan tap chungin i aw thute min hrilh a. Mahse ka rilru chuan a ngaidam thei chuang lo che. In pa nen chibai ka rawn buk ni che a, i mitmeng erawh ka hmuhhmayh loh avangin ka thinrimna a kiam a, pangngai takin nun bul ka tan thei kha a ni.

Kum tam liamin tunah chuan fa pawh 3 in nei tawh hnuah i thlain min rawn tlawh hi a tawpna ni sela, hriatchhuah pawh ka duh tawh lo che. Hlim takin i pasal leh fate tan nu nih la, chhungkaw hlim tak ni ang che u. Hei hi I tana ka thuziah hnuhung ni rawh se.

## Boxing to Politician

WBC heavyweight champion lai, Vitali Klitschko chuan kum 2015-a an ram President inthlan hunah a chuh ve dawn tih a sawi. Ukraine opposition party leader Klitschko chuan, "Kan ram hi ramdangte ruala hmasawn tir ka duh a, siamthat ka duh avangin President inthlan lo awmturah hian ka chuh ve dawn a ni." tiin a sawi. Ukrainian boxer ropui, World heavyweight boxing awp bet tute unau zinga a upa zawk Vitali Klitschko hi Ukrainian Democratic Alliance for Reforms (UDAR) Party Leader ni lai mek leh MP a ni.

## Formula1

Supreme Court chuan Indian Grand Prix Organiser Jaypee Group lakathubuai an thehluh chu November 1 ah ngaihtuah turin an ruahman. Uttar Pradesh sorkar chuan Indian GP Organisers Jaypee Group lakah India Grand Prix neih hmasakber 2011 a tax a pe tur an pe lo niin an sawi.

## Football

AFC Cup 2013 semi final khel zak takah Mizo pathum awmna East Bengal chuan Al Kuwait SC chu hneh lo mah se, kan mizo tlangvalte hi an khel chhunah an khel tha thin hle a. Semi Final second leg lamah pawh mizo pathum Mama, Didika leh Robert-a te hian an khel vek a ni.

AFC Cup-ah hian Didika'n East Bengal tan hian goal 4 thunin, Baichung Bhutia nen Indian Player zinga AFC Cup a goal thun hnem ber nihna an hauh dun a ni. Didika hian AFC Cup tum khat khel (edition khat) a goal khung hnem ber ni lai Baljit Sahni-a'n kum 2011 a goal thum khunga record a siam chu khumin, record thar a siam bawk a ni.

## Boxer boral

'The Little soldier' tia sawi thin Junior featherweight Mexican boxer, Francisco "Frankie" Leal, kum 26 chu Dt. 20.10.13 zing lama Raul Hiraes nen Cabo San Lucas, Mexico-a an inhnek naa round 8-na a a knocked out pa chu a thluak lam a lo khawih tel avangin an inhnek atanga nithumnaah a boral. An inhnek tihtawp a nih hnu hian "Little Soldier" hi medical lamin buaipui nghalin, nikhaw hre lova a la leh reng avangin rei tak buaipui a nih hnuah ring atangin stretcher hmanga zawnhhuah a ni a, Cabo San Lucas a hospital ah admitted nghal a ni a. Hemi hnu hian San Diego lama hospital ah kal pui leh niin, an inhnek atanga nithum naah a boral ta a ni. Leal hian kum 2005 atang khan professional fighter ah a lut tan a. March 2012 khan an inhnek laiin tuna a buai ang hian buai tawh bawk a ni.

# Vawksa rep sil pahin... " Kan nu rawn chhuk hi chuan ka down vek zel"

- Sawmtea GS, KMS

# Khatiang em em khan KFC ka ei lo kha ka la na ang tih kalo ring lo.

-Mr.President

# Puja ka haw lo chu ka ti fuh viau e..

-Rs-i c/o Temami

# Bollywood star emaw ka inti rum rum a lawm le..

-Tina Hrahsel

# Noida KFC a mak lutuk, a chhung a ut vek maw le..

-Serena

# Taj Mahal kawtah Mizo zinga titau hmasa ber ka ni mai lo maw..?

- Tetei @SA Girls..

# Nula ina bawngsa rep zawrh chu a nuam ngei mai.

- Didina @ Inkhel thiam

#Nulaho tan chiah... " he lamah tlangval fel thianghlim, whole body virgin biak theih rengin ka awm e"

- Bena @ Duffians

# PC. Puia min ti tawh suh u..

- Ex. PC. Puia

#Tun tum sport chu leiletah football kan khel a ni ringawt alawm..

- Valpax

# Asansol leh Niar2 inkhel zet kha chu a...luhai map mai lawm..

- Asansol Makpaho

# KMS Sport nei leh tawh ang u...

-Mafela @ Keshtopur

## CMWA

Calcutta Mizo Welfare Association chuan Kolkata-a mizo awmte tan Sports buatsaih turin hma a la mek a. Hemi chungchanga hmalaknate a chak zawk theihna turin:

Chairman: H. Lalzirliana

Secretary: Alex Rosangluaia

Asst. Secy: Lalmalsawma te bakah member engemawzat a ruatin, Sport Sub-Committee a din a ni.

Tin, tunlai hian CMWA Annual Fund khawn mek zel a, Kolkata Mizo zawng zawngte lo inring lawkin membership fee pek theuh i tum ang u. Hetiang hian khawn a ni ang. Chhungkuua awmte tan- Rs. 200, Mimal hnathawka awm- Rs. 100 leh Zirlai tan Rs. 30 theuh a ni dawn a ni.